

OMUKWETU

Registered at the General Post Office as a Newspaper

AGALUKA KU EUROPA



Sestela Aletta Amadhila, okwa galuka molweendo lwetalelo-po lye lyoomwedhi hamano muEuropa. Omupangi Amadhila okwa talele po omahala o-gendji giipangelo muSoomi.

Hwiyaka okwa tsakanene wo nAnamibia mboka ye li ko keilongo. Mbaka okwa ti kutya otaa gandja omakundo o-mapyu koshigwana ashihe. Meme Amadhila metalelopo ndika okwa li a hala okwiwini-nika oowino dhoshilonga shokugamena uundjolowele moshigwana nkene tashi ende palwe.

"Ehumokomeho mpeyaka enene noonkondo miipangelo naashono sha mana osho shoka kutya uuthemba womuntu otau simanekwa notau gamenwa neitulomo."

Osho omupangi mwene a ti.

Sigo onena sestela Amadhila oku li mefudho, ina tsikila iilonga ye mOnandjokwe moka a longo ethimbo ele. Pahokololo lye mwene ota ka tameka esiku lyotango lyaAguste. Pethimbo ndika okwa fa a hala okukutha manga omishila dhaakulukadhi moondunda.

A. Amadhila

Ongeleka nayi koleke omu- kanka gwokuputudha no- kuhwamitha oonzapo dha- Jesus mu ELOK

Ongerki ya Kristus oyi li muuyuni. O-ya yooloka muuyuni sho yi na omwenyo; oyo olutu lwaKristus. Uuyuni kau na omwenyo, oshoka Kalunga ke li mo muwo. Eyooloko lyOngerki muuyuni otali monika moshilonga shayo sho iilyo yOngerki AYIHE tayi thiminikwa kohole okwaadha omuntu kehe, nokukala onzapo ethimbo kehe nomonkalo kehe.

Jesus oku li pamwe noitaali mboka miinima mbyoka tayi monika naambyoka itaayi monika ngashi moohapu, mOmbepo Ondjapuki, momagalikano, n.sh.t. Epulo ngiika otali ti, otatu mono ngiini omukalo okumona aatumwa, opo ya fale evangeli ku ayehe?

Manga inatu ya komikalo (METHODS), onawa ngele tatu pula:

—Oku na tuu aantu taa pumbwa EVANGELI?

—Ngele itaa pewa EVANGELI, oshike tashi ningwa?

—Ngele taa pewa EVANGELI, otashi kwatha shike?

—Oye li peni? Omomaudhigu geni? Sho twa mono omayamukulo, otatu tsikile nomapulo:

—Otaa kwathwa ngiini?

—Olye te ya kwatha?

—Otu na tuu sha oku ya kwatha?

—Otu na tuu ehala okukwatha?

—lithiminiki yetu oyo tuu ohole, oluke-no nenge esimano lyetu?

—Otatu lalakanene okwaadha shike?

—Otatu tameke uunake nopeni? n.sh.t.

1. "Ngula iilonga kombala".

Miilongo yimwe mOwambo omu na omukalo omwanawa okufala elaka lyomukwaniilwa kuayehe. Omukwaniilwa otaga gandja elaka kelenga. Elenga otali gandja etumwalaka koshilongo ashihe pamukalo nguka: Otali londo pombanda yoshigunda tali igidha, "Ngula iilonga kombala". Ngoka ta uvu elaka lyelenga naye osho ta ningi sigo methimbo efupi oshilongo osha pwa ko kelaka lyomukwaniilwa.

2. Omunashilonga

Omunashilonga na kale e hole (agapee) "Ngele ope na ohole nena aasita otaa mono efudho ele". Ohole otayi pumbiwa tango momalenga. Ohole oyo uukwatywa wuukriste. Ohole oyo oshinima tashi fala megulu. Ohole oyo ombepo yomegulu Ombepo Ondjapuki. Ngele kayi po, oyo tayi kongwa tango. Otatu pewa opo otatu fala ELAKA (message). Oshilonga shika shokufala OHOLE oshaayehe.

Ano shoka tashi pumbiwa okupepaleka oitaali, ya tsakanene na Jesus mwene. Ya lye iikulya ya kola. 2Tim.2:15. Oku-

hogolola aanashilonga nokutopolelathana iilonga nokutala oshike tashi kala mo No 1. (Iil.6:1-6) Aanashilonga yoyene ya pewe Ombepo Ondjapuki, edhimopo lyoondjo nohole. Otaku pumbiwa elongo nedheulo maanashilonga, ya mone amatululilo nomayelithilo. Ihe aanashilonga ngele inaa hupithwa nokaye na Jesus, omikalo ndhoka noshilonga ashihe tashi kala "onete onene mefuta yi na ombululu". Moongundu ndhika aanashilonga naa kale ye na:

1. Jesus Kristus ngashingeyi momuti-ma

2. Ohole ya za ku Jesus


3. Kristus ta gandja iilonga kuyo.

3. Iilonga.

Otu li unene moongerki, notwa mangwa komalandulathano. Mboka ya longekidhwa naa fale elaka. Ongerki yi kale ya fa eha lyokunwetha omahooli tayi gandja omahooli, omahauto ga matuke. Yi kale ngokefe ya pumbiwa kaantu, okulya nokunwa yo ya ye miilonga ye na oonkondo. Okulonga aantu ayehe ya ye miilonga okukonga shoka sha kana. (Luk.15)

Okulonga huka okwesiku kehe neithano lyaayehe. Okufala aantu ku Jesus - otaa tsikile okulonga. Miilonga otaa pewa iholekwa nokuuva ko oshilonga, sigo atuhe twa thiki megwano. Ef.4:16. Otu na okukala miilonga twa koka twa ninga aakuluntu miinima yomegulu. "Patulula oradio konga ostasie yomegulu, opo u pulakene shoka shi li muuyuni womegulu". GALIKANA opo u pewe shoka to fala komuntu.

Tala kepardja lya landula



Omuuvithi gwevangeli Titus Ngula

4. Oongundu niitayi yadho.

Ewilikongundu lyokweevangelitha ando li kale li uvite ko oshilonga shalyo. Okushanga miifo nuukalata. Okugongela iimaliwa yi lande oombako niyenditho. Iilonga mbika ando otayi longwa moongundu adhihe dhaakriste momapipi agehe. Unene okukonga omuntu gumwe nagumwe. Okulongekidha aayapuki okulonga oshilonga sheyakulo. Ef.4:9-16 moongundu adhihe.

Omulongwa ota ningi omuyakuli.

Osho ngaaka oshilonga tashi taandele, tashi adha omuntu kehe. "Shoka itaashi tulwa miilonga otashi dhimbiwa". "Evangelitha li uvithilwe iigwana ayihe". Oshilonga shOngerki osho okuninga ayehe aalongwa ya Jesus moongundu dhawo. Oshilonga shika otashi tameke megumbo.

5. Egumbo.

Egumbo olyo eha lyokuputudhilwa nolyo wo eha lyokuputudhila aanegumbo. Omagumbo ga dhimbuluthwe oshimpwiyu shokuhokololelathana Jesus megumbo. Osho wo omagumbo gaakriste ga fale ELAKA muushiinda. Oowandaha inadhi gwana. Aantu oyendji oye li momagumbo, onkee omo naa faalelwe Evangelitha. Aakuluntu aakriste otaa pumbwa ya pendulwepo, opo ya kuthe oshinaku-gwanithwa shawo shotango okuputudha omagumbo gawo pamwe na Jesus. Ef. 6:4.

6. Egongalo.

Oshilonga shomagongalo otatu shi pandulile Kalunga omolwoshikalimo: oopito dhokuhambelela, okumangululwa moondjo, okuhempulula eitaalo neyambeko, n.sh.t. Ihe epulo olyo ndika kutya egongalo kehe li kambadhale okuputudha aayakuli naakuluntu, opo ayehe ya longe megongalo.

Omauvitho wo naga kale pampumbwe dhapulakeni nomayamukulo komapulo gawo. Aauvithi otaa pumbwa omapukululo ngashi:

Ootate Shinana, E.Angula, Ortiz, Santa-la, Billy Graham, de Koning, n.sh.t. opo ya papudhule aauvithi muungundu uushona naambaka otaa ka dhika uungundu momagongalo mboka tau longo megongalo sigo egongalo alihe Iya nu Oohapu ngomeya omanamwenyo Joh.6:35.

Oongundu dhomagalikano megongalo, oonkundathana nomauvathano momagongalo. "Ngele itatu galikana nena uukwambepo otau kuluka". Uungundu megongalo otau eta eyambeko mokukalamwenyo kwesiku kehe. Onkee aayevangeliste moshiwikembibeli naa longe uungundu momagongalo mboka tau kwatha egongalo alihe.

7. Ongerki.

Otu na oongundumbibeli momagongalo

noosikola dhombibeli mu ELOK. Omukalo gwokufala evangeli otagu pumbwa elongo nepapudhulo. Unene aalongi moosikola ndhoka shaa tuu taa yeelwa otaa vulu okuninga oshindji, naamboka taa piti mo opo ya ka ningepo sha, oshoka shaa ngoka a ladhipikwa kOmbe-po Ondjapuki, ota ningi omulongi gwamukwawo. Oshilonga shuusaseri moositaali ayehe osha pumbwa shili okutulwa miilonga yesiku kehe.

Oonkambadhala dhilwe.

ELONGELOKUMWE noongerki dhopuushiinda otali pumbiwa. Okukambadhala okutala yalwe nkene haa longo, otashi kwatha wo. Ongerki oyo eiuvo lyoshigwana, onkee oyi na okukambadhala yi tseye aantu kutya oye li peni, notaa yakulwa ngiini. Omafaneko noonkambadhala oompe otadhi pumbiwa. Shoka shi na oshilonga osho okutula shoka shi li moohapu miilonga.

"Tula ayihe miilonga" mbyoka ya popiwa moohapu dhaKalunga. Mpaka onawa wo pudhimbululwe ompumbwe onene kutya oyo uukumwe waanashilonga moongerki adhihe moshilonga shoka, okugongala kumwe ya yambekwe ku **Jesus nguka gumwe** opo ya fale eyambeko maantu ayehe, pwaa na omayololo gomalwaala nenge geitaalo.

Okugalikana kumwe nokukala **MEITAA-LO** okwo esindano nonzapo kutya, **EE-NO SHILI, AYEHE OYA GALIKANENWA**. Jesus ta **kutha** ko ondjoko yoye, Jesus ta tula ondjoko ye ompu. Shika otashi ti aantu ayehe naa pewe oshilonga sha sha, opo esilohenda Iya Kalunga li longe maantu ayehe. "Ihe TANGO oyi Igan-dja yoyene kOmuwa-nokutse wo kehalo Iya Kalunga" 2Kor.8:1-5.

K. Dumeni



Omuuvithi gwevangeli Junias Vaino Kaapanda

OWAMBOKAVANGO CHURCH BOOK DEPOT
P/B 2013 Ondangwa 9270

ONDANDO YOMAMBO - PRICE LIST
OMAMBO GOSKOLA

| | R | c |
|-------------------------------------|---|----|
| Moshilongo shetu | 0 | 50 |
| Mary Slessor | 0 | 55 |
| Epopilongulu laKunene la kana | 0 | 65 |
| Oushitwe wOinamwenyo mOwambo | 0 | 55 |
| Shitlangu | 1 | 80 |
| Omona wOhamba | 0 | 85 |
| Omuntu, Ishi | 0 | 55 |
| Elaka lyOshindonga St. VI | 0 | 70 |
| Shimbungu mOshikwanyama | 0 | 95 |
| Moshinkoti shaShakespeare | 1 | 80 |
| Robinson Crusoe. | 1 | 80 |
| Egumbo lyaa na elugo | 0 | 85 |
| Nehale lyaMpingana | 0 | 50 |

OMAMBO GOPANGELEKA

| | | |
|---------------------------------|---|----|
| Ombimbeli Ondjapuki | 1 | 50 |
| Ombimbeli lyapuki | 1 | 50 |
| Omaimbilo (Ehangano) | 1 | 70 |
| Okatekisa okashona | 0 | 30 |
| Okatekisa kanini | 0 | 30 |
| Ondjalulamasiku 1975 | 0 | 30 |
| Ongerki yOmowambokavango | 3 | 00 |
| Oomvula omilongo hamano dhEtumo | | |
| lyuunamiti lyaSoomi | 1 | 50 |
| Esiloshimpwiyu lyegumbo | 0 | 55 |

Ihatu tumu nando omambo moongunga, kakele kaalandithi yomambo, onkene mokumbestela embo nenge sha shilwe, tuma embestelo nofuto. Ino dhimbwa okugwedhela mo 20c omolwoposa.

Ohatu landitha wo iifo yokunyolwa noopena omaludhi gi ili nogi ili, omapeko gokupungulwa oombapila nosho tuu ipumbiwa yilwe yoombelewa. Oompunda dhoombapila dhuunene u vulathane omo hadhi kala wo.

OMAMBO GIIDHUMO - BOOKS IN FOREIGN LANGUAGE

| | R | c |
|----------------------------------------------|----|------|
| Old Test. Commentary | 14 | — 20 |
| Cruden's Complete Concordance | 5 | — 70 |
| The Gospel of Mathew Vol. 1 and Vol. 2 | 2 | — 10 |
| The Gospel of Mark. | 1 | — 80 |
| The Gospel of John. Vol. 1 and vol 2 | 2 | — 30 |
| The Gospel of Luke | 1 | — 80 |
| The Letter to Romans | 2 | — 10 |
| The Letter to Corinthians | 2 | — 10 |
| The Letter to Galatians and Ephesians | 2 | — 10 |
| Revelation of John vol 1 and vol 2 | 2 | — 10 |
| Die Lukas—evangelie | 1 | — 00 |
| Die openbaring van Johannes | 0 | — 70 |
| Sosiale Etiek | 1 | — 00 |
| Die Brief aan die Galasiërs | 0 | — 40 |
| Die Profeet Hosea | 0 | — 40 |
| Ons Erediens | 0 | — 40 |
| Moses | 0 | — 40 |
| Wat is die mens | 0 | — 60 |
| Oriëntasie | 1 | — 00 |
| Sending Kerk en Sakramente | 1 | — 40 |
| Die Groot Kategismus | 1 | — 40 |
| Godsdienst—Onderrig | 0 | — 50 |
| Genesis | 0 | — 50 |
| Inleiding tot die Nuwe Testament | 0 | — 50 |
| Good News for Modern Man | 0 | — 60 |
| Inleiding tot die Ou Testament | 1 | — 00 |
| New Testament Afrikaans—English | 0 | — 85 |
| Kontrak soos Owambo dit sien | 0 | — 30 |
| Mathematic St. 9—10 | 3 | — 90 |
| New English Bible | 2 | — 00 |
| New Test. Commentary | 14 | — 20 |

Etegameno lyomagongalo omape inali tsakanithwa

Egongalo limwe alike lya adha omuthika gwegongalo li shi okwiilela lyomondjakulwambinga ne dhomoshitayingeleka shOndonga, dha li dha tegelelwa dhi ninge mbala omagongalo.

Osha za mehokololo lyokangundu kedhiko lyomagongalo moshitayingeleka shoka. Pahokololo ndyoka lye etelwa oshigongi shoshitayi eti 14.6.75, amushanga gwokangundu omusamane H.D.Namuhuja, okwa ti:



"Edhiko lyomagongalo omape moshitayingeleka shika, oshinima she ende kashona okuza 1973. Ondjakulwambinga yegongalo lyaNayena, Elobe, oyo ayike ya vulu okwaadha omuthika gwegongalo, li na omusita gwalyo. Oondjakulwambinga oonkwawo; Omukandu megongalo lyaLukonda, Onankali megongalo lyaNyaanya nOnamukulo megongalo lyaShigambo sha nyengana.

Omusamane Namuhuja ngoka a ti pamwe okwaahumakomeho huka, okwa za wo miilonga yokangundu, okwa tumbula wo uupyakadhi pokati koongamba dhomagongalo nopokati kiilongo, kutya oshinima shimwe tashi ya imbi okutsakanitha iilonga yawo.

Oonkundathana dhoongamba pokati komagongalo omakulu, Oniipa, Oshigambo, Ontananga nOlukonda, nadho dha pwakele moshigongi shoka. Etsokumwe lyomadhiladhilo inali adhika, nokangundu oka pewa oonkondo ka tsikile nokukonakona oongamba oonkulu dhi ukililithwe wo.

Oshigongi osha tsu kumwe medhiladhilo ndika, kutya oongamba dhoshilongo, dhaa kale dhi na sha noongamba dhegongalo. Kakele kondjakulwambinga, Omukandu nOnankali ndhoka itaadhi ka mona ngiika manga aakwanegongalo ya gwana, Omukandu ogwo aakwanegongalo ya gwana, Onamukulo oyo ayike ya tegamenwa yi ninge mbala egongalo. Omutonateli gwoshitayingeleka shoka, omusamane Festus Ashipala, okwa pandula uudhiginini wokangundu nehawamo miilonga yako.

YATATU MONDONGA, YA KUUTUMBI-KWA MIIPUNDI YEVULULKO

Aayevangeliste 3 moshitayingeleka shaNdonga, oya simanekwa montaneho yegongalo lyaNiipa nolyoshitayingeleka a-shihe sho ya pewa iipundi yesimaneko moka taa ka vululukilwa mo koshilonga shawo shevangeli ye shi longo mOngelaka omimvo odhindji.

Aasamane Jason Ndokosho, (81) Omuntele, Abraham Shaduka, (86) Oshigambo, na Festus Niimpala (75) Onayena, oya longo oshilonga shuuyevangeliste mu Elok omimvo dhi vule 30.

Omusamane Ndokosho, (Mbuluwaka) oye awike kwa li a mono ompito yokukala pamwe noshigongi shoshitayingeleka, mOniipa nokwa taamba oshipundi she mwene. Ooyakwawo yaali, oya faalelwa omakundo gawo.

Edhina Mbuluwaka, omuyevangeliste Ndokosho nando okwe li lukilwe nomadhiladhilo gesheko, pahokololo lye mwene, okwa ti kutya ine li sa ohoni, okwe li humbata nuuntsa.

Okwa kumagidha ayehe haye li tumbula nuumbanda, ye shi ninge nemanguluko, oshoka okwa ti: "Ndjika kayi shi yamakunde, yo kayi shi yantanga, ihe o-yevangeli."

Epangelongeleka olyo lya uthile aana-shilonga mbaka ya ka lye oshikwiila shawo shevululuko.

Omusamane H.D.Namuhuja ta bokolo'a iilonga yokangundu kedhiko lyomagongalo omape moshitayingeleka shOndonga, moshigongi shoshitayingeleka.

BLOEMFONTEIN.

Ompangu yopombanda yaBloemfontein inayi zimina eindilo lya Ezriel Taapopi (19) na Joseph Kashea (23) mboka ya li ya tokolelwa ondholongo yomimvo 5 mompangu yaVenduka 30/7/1974.

Ayehe mbaka iilyo yaSWAPO noya li ya kwatwa omolwiilonga yuupolotika. Ayehe oya falwa ngashingeyi kOntuntu ya-Robben.

Advertiser 3/6/1975)

Waa pandula noyaka

Tse aakwanegongalo lyaShitayi, otwa pandula ekwatho lyaamwameme amuhe meyakulo lyemanya lyokombila yomusitagongalo Johannes Itope, ndyoka lya ningilwa oshituthi shehambelokalunga 1/6/1975. Aatondoki yonkugo ndjika ogonggela iimaliwa yokulanda emanya ndyoka lyondilo oya li mbaka:

| | |
|-------------------------------------|---------|
| Uuthiga wa nakusa | R 50,00 |
| - Aasitagongalo ya ELOK | 26,00 |
| - Ookuume naakwezimo mpaka naampeya | 89,00 |
| - Egongalo Oshitayi | 80,54 |
| - Egongalo Eheke | 16,70 |
| - Egongalo Onguta | 7,08 |
| - Egongalo Oniipa | 1,50 |
| - Egongalo lyaMbaye | 56,00 |

Egongalo lyaMbaye mpaka olya kwatelela mo omagongalo ogendji gomOwambo, omolwaamati mboka ye li kiilonga ya zile kiitayingeleka shUuninginino noshUukwanyama. Aavenduka oya tumine wo omukalelipo gwawo moshituthi shedh'iko, meme Elizabeth Kathindi.

ONDJILA yokweenditha emanya 'okuza kuAngola sigo mOshitayi oya pula R 145,78
Kumwe naambyoka ya gongelwa 327,42

R 473,10

Waa pandula noyaka. Tse atuhe otwe mu halala eyambeko lyaKalunga, kehe ngoka wa gandjele sha koshilonga shika, niimaliwa, negalikaneno nenge wi ile moshituthi nokuwolo nenge nepopitho.

Eegululo lyoshituthi olya ningwa kutatekulu omumbisofi, dr.L.Auala ngoka a pandula egongalo alihe lyaShitayi, nuunene omusamane Mulanduleni Itope, ngoka a kondjo shili a mone emanya lyeopalo enene kiilongo, pamwe nomusitagongalo Titus Ngula.

Omumbisofi okwa gandja kuMulanduleni Omimbili, eimbilo nokambo kehistolli lyaNehale lyaMpingana ongepandulo lyuudhiginini we. Komusitagongalo, T. Ngula, omambo gatatu gefalulo lyOmbimbili.

Oshituthi osha hulithilwe komupehamuwilikingleka, tate Kleopas Dumeni.

Peha lyegegongalo
T. Ngula.

Eilikano lomufininikwa

Omwene Kalunga ketu, owe tu lombwela fye ovanhu noshiwana shoye tu duli-ke kEpangelo liwa ile lii. Omwene, oshiwana shoye osha kendabala okudulika, ndele luhapu sha kala mekondjo okutomhela Epangelo oushima walo noku li ulukila oshili yomeendjovo doye. Ponhele yoku udiwa ko, Omwene, oshiwana osha pilukilwa needibo. Paife Omwene, ohatu alukile kuove nokukakama.

Ou u li Omupangeli meulu nokombada yedu, owa mona omhito oku uya moiwana ei yetu nowe tu fininika tu yeulule kanini oivelo yomitima yetu, ndele opo nee we tu lombwela tu popye oshili yomeendjovo doye noshili ya tya ngaha, twe i holola koipala yovapangeli vetu. Ndele natango Omwene, ohatu alukile kuove nokukakama.

Nd. Shilongo

JA TOIVO ITE ETHIWA ANIWA.

Oministeli ya S.A. yiinlma yoompangu, omusamane Jimmy Kruger, okwa ti kutya oonkundathana dhokugalulila kegumbo Aasuidwes mboka ye li kondholongo kontuntu yaRobben, inadhi kwatelela mo nando omusamane Ja Toivo, oshoka nguka oministeli oya ti ogwokOkapa, oko a dhikile ongundu ye yuukomunisi, noSWAPO.

Aanandholongo kontuntu ndjoka mboka ya zile kuSuidwes, osha li sha kundathanwa momutumba gworaata ya S.A. muApilili numvo mOkapa, nosha monika uusama sho inaa edhililwa moshilongo shawo.

(Die Suidwes-Afrikaner 13/6/1975)



Omuuvithi gwevangeli Jason Ndokosho (Mbuluwaka) ngoka a ningilwa oshituthi megongalo lyaandjawa mOmuntele nomoshitayingeleka shawo shOndonga, opo a ka vululukwe po koshilonga shoka shethimbo ele. Ngashingeyi ondjambi ye, ohayi ithanwa oshikwiila shevululuko.

OSKOLA YOMONANDJOKWE

Otayi taamba aalongwa aape, Kalunga ngele e shi hala ngaashi tashi landula mpaka:-

AAVALITHILONGWA

Mboka ya pita oskola ya "Ingeskrewe Verpleegster" nenge "Algemene Verpleegster" taa vulu okutaambelwa mo petameko lyomumvo 1976.

Tuma eindilo lyoye mbala.

AAPANGILOGWA: (Ingeskrewe Verpleegsters)

Mboka ya pita St.VIII otaa vulu okutaambelwa mo. Oskola otayi tameke 30.1. 1976. Tuma eindilo lyoye pamwe nonzapo yo St VIII, nenge onzapo yekonako no lya Juni nombapila yegongalo manga esiku 30 lya Septemba inaali thika.

**OMUKULUNTU GWOSKOLA,
Onandjokwe Lutheran Hospital.
Private Bag 2016, ONDANGWA. 9270**



Omusitagongalo Titus Ngula mOshitayi, ota taamba omambo gefatululo lyOmbimbeli miikaha yomumbisofi, dr. L.Auala moshituthi shedhiko lyemanya kombila yomusitagongalo Eino Johannes Itope.

Ino i monena nge?

Okofa mu na oukalata vefendelo neembapila dikwao dopashiwana medina Josua Uahengo noinima ikwao ihapu, ino i mona? Edina Josua Uahengo ola nyo-lwa yo meni lokofa. Oya kana twa dja kOvenduka nobesa eti 7 la Juni 1975.

Ou we i mona, tumina nge elaka kowadelesi ei: **Josua Uahengo, Onhelewa, Pk. Omungwelume.**

OMUKWETU

Oye oshifo shOngeleka onkwaevangeli paLuther yomOwambokavango. Ohashi nyanyangidhwa mOnlipa. Omukuluntu gwoshifo omumbisofi dr. Leonard Auala. Amushanga Rev. Sebulon Ekandjo.

Ondando yoshifo komumvo muSuidwes nomuAfrika alihe R 1. 00 kombanda yomafuta R 2. 00.

Ondando nomambesitelo naga tumwe kOmukwetu Onlipa; P/B. 2013, Ondangwa.

Omatseyitho agehe gomuntu mwene ohaga futiwa kumwene.

OWAMBOKAVANGO CHURCH PRESS
PRIVATE BAG 2013, ONDANGWA S. W. A.
9270